



Eich cyf/Your ref P-05-1013
Ein cyf/Our ref DET/00847/21

Clerc y Pwyllgor Deisebiadau
Tŷ Hywel
Bae Caerdydd
Caerdydd
CF99 1NA
Petitions@Senedd.Wales

19 Ebrill 2021

Annwyl Glerc y Pwyllgor Deisebau,

Ysgrifennaf atoch yn dilyn llythyr gan Janet Finch-Saunders AS ar 30 Mawrth ynghylch deiseb yn ymwneud â chymorth ariannol i unigolion hunangyflogedig yn niwydiant cerddoriaeth fyw Cymru (P-05-1013), a rannodd ohebiaeth gan y deisebydd Peter Phillips, dyddiedig 5 Mawrth.

Nodaf bryderon parhaus y deisebydd sy'n teimlo nad yw'r materion y mae wedi'u codi o'r blaen wedi cael sylw digonol eto, yn benodol pryderon bod cefnogaeth Llywodraeth Cymru hyd yma wedi methu â chefnogi rhai Cerddorion llawrydd y mae angen cymorth arnynt o hyd, a materion yn ymwneud â'r meini prawf cymhwysedd, y broses ymgeisio a'r cyfathrebu ar gyfer y Gronfa Llawrydd.

Fel yr amlinellwyd mewn gohebiaeth flaenorol, wrth gynllunio'r Gronfa Llawrydd gwnaed penderfyniadau anodd yng ngoleuni'r adnoddau cyfyngedig sydd ar gael. Gwnaed y penderfyniadau hyn mewn partneriaeth ag awdurdodau lleol, yr undebau creadigol a diwylliannol, a chyda'r gymuned lawrydd drwy Dasglu Llawrydd Cymru. Cytunwyd y dylai'r Gronfa ganolbwyntio ar nifer fach o sectorau â blaenoriaeth sy'n cyd-fynd ag amcanion y Gronfa Adferiad Diwylliannol i gefnogi cynaliadwyedd sectorau diwylliannol a chreadigol yng Nghymru y mae pandemig COVID-19 yn effeithio'n sylweddol arnynt.

Cyflwynwyd y Gronfa ar sail y cyntaf i'r felin yn hytrach na fel Cronfa gystadleuol yn seiliedig ar lefel yr angen, mewn ymateb i bryderon a godwyd gan randdeiliaid sy'n gysylltiedig ag anawsterau gweithwyr llawrydd wrth ddarparu tystiolaeth o golli enillion. Cyflwynwyd y gronfa fesul cam ar gais rhanddeiliaid, er mwyn helpu i liniaru unrhyw faterion hygyrchedd sy'n gysylltiedig â'r dull y cyntaf i'r felin ac i roi mwy o amser i ymgeiswyr baratoi. Yn dilyn adborth o gam un, bu inni gryfhau ein cyfathrebu ar gyfer y camau dilynol.

Bae Caerdydd • Cardiff Bay
Caerdydd • Cardiff
CF99 1SN

Canolfan Cyswllt Cyntaf / First Point of Contact Centre:
0300 0604400

Gohebiaeth.Dafydd.Elis-Thomas@llyw.cymru
Correspondence.Dafydd.Elis-Thomas@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Rydym yn ymwybodol bod llawer mwy o weithwyr llawrydd a sectorau sydd angen cymorth arnynt o hyd ar yr adeg anodd hwn. Gan gydnabod mai dim ond Llywodraeth y DU sydd â'r pŵer cyllidol i sicrhau diogelwch sy'n cefnogi pob unigolyn rydym yn parhau i bwysu ar Lywodraeth y DU i ymateb a bod yn gyfrifol o ran cefnogi'r rhai sy'n dal i syrthio drwy'r rhwyd.

Mae'r Gronfa Llawrydd, fel y cyntaf o'i fath yn y DU wedi bod o fudd i nifer sylweddol o weithwyr llawrydd creadigol a diwylliannol yng Nghymru, ac mae wedi cefnogi 3,584 o unigolion gyda £18m o gyllid hyd yma. Ar 22 Mawrth, cyhoeddais fod Llywodraeth Cymru yn lansio cam pellach o'r Gronfa Adfer Diwylliannol, gyda hyd at £30m ar gyfer chwe mis cyntaf 2021-22 i helpu i gefnogi sector diwylliant amrywiol Cymru drwy'r pandemig. Mae hyn yn cynnwys dyraniad pellach i'r Gronfa Llawrydd a fydd yn agor ar gyfer ceisiadau ddechrau mis Mai. Ar hyn o bryd mae fy swyddogion yn casglu adborth gan ein rhanddeiliaid, gan gynnwys gweithwyr llawrydd a'r undebau creadigol, i nodi'r gwersi a ddysgwyd i lunio'r pedwerydd cylch hwn o gymorth ariannol i weithwyr llawrydd fel ei fod yn diwallu anghenion y sector. Mae hyn yn cynnwys adolygiad o'r meini prawf cymhwysedd ac archwilio cynllun nad yw'n dilyn dull gweithredu cyntaf i'r felin. Hefyd, rydym yn cynnal dadansoddiad o'r gweithwyr llawrydd a gefnogwyd hyd yma a bydd y canfyddiadau hyn hefyd yn cael eu defnyddio i lywio'r gwaith o gynllunio cymorth yn y dyfodol. Rwy'n ymwybodol bod y deisebydd wedi holi'r Pwyllgor Deisebau o'r blaen ynghylch cymhwysedd artistiaid teyrnged, cantorion priodasau a chantorion tafarn i'r Gronfa Llawrydd. Bydd gwiriwr cymhwysedd ar gael ar wefan Busnes Cymru ddechrau mis Mai, a byddwn yn cyngori bod unigolion sy'n dymuno derbyn cyllid yn cwblhau'r gwiriwr cymhwysedd cyn gynted ag y bydd ar gael, gan y bydd nifer o ystyriaethau sy'n pennu cymhwysedd.

Mae Llywodraeth Cymru yn cydnabod yr heriau parhaus sy'n wynebu rhannau o'r diwydiannau diwylliannol a chreadigol nad ydynt yn gallu gweithio o hyd oherwydd y cyfyngiadau sydd ar waith i gyfyngu ar ledaeniad y feirws a diogelu iechyd y cyhoedd. Nodwn yr effaith benodol y mae hyn yn ei gael ar weithwyr llawrydd sy'n gweithredu mewn sectorau fel y sector cerddoriaeth fyw nad ydynt yn gallu gweithio a chreu incwm. Mae cynllun busnes Cymru Greadigol ar gyfer 2021/22 yn cynnwys camau i ddarparu cymorth parhaus i'r sector cerddoriaeth fel sector â blaenoriaeth yn ystod y cyfnod anodd hwn. Mae hyn yn cynnwys datblygu cynllun gweithredu o dan arweiniad y diwydiant ar gyfer y diwydiant cerddoriaeth fasnachol yng Nghymru a fydd yn adlewyrchu'r angen am gamau gweithredu tymor byr i gynorthwyo'r sector i wella o bandemig COVID-19, a chynlluniau tymor hwy ar gyfer datblygu'r sector er mwyn creu dyfodol cynaliadwy mewn marchnad fyd-eang. Mae'r cynllun hefyd yn rhoi blaenoriaeth i ddarparu canllawiau clir a diweddar sy'n cefnogi dychwelyd i weithgarwch yn ddiogel. Bydd hyn yn defnyddio dull graddol, gan weithio gyda'n rhanddeiliaid wrth i gyflyrau iechyd y cyhoedd ganiatáu symud drwy lefelau'r Cynllun Rheoli. Mae'r dull hwn yn ein galluogi i ymateb i unrhyw gynnydd yn nhrosglwyddiad y feirws a gweithredu pan fo sicrwydd bod cyflyrau iechyd y cyhoedd yn caniatáu i leoliadau, digwyddiadau a pherfformiadau byw ailddechrau. Mae'r Rhaglen Digwyddiadau Prawf yn elfen hanfodol o hyn, a bydd Llywodraeth Cymru yn edrych ar sut mae'r rhain yn cael eu cynnal ledled y DU, ac yn dysgu lle y bo'n briodol.

Deallaf y bydd y ddeiseb yn cael ei hystyried ymhellach gan y pwyllgor dilynol, unwaith y bydd wedi'i sefydlu yn dilyn Etholiad y Senedd.

Yn gywir,



Yr Arglwydd Elis-Thomas AS

Y Dirprwy Weinidog Diwylliant, Chwaraeon a Thwristiaeth